

▶ **NAMBA 2 PREA
BILONG SANTU JOSEP**

Santu Josep, yu gutpela man bilong santu Maria na gutpela wasman bilong mi. I no gat wanpela man o meri i bin singaut long yu, na yu bin les long harim singaut bilong em. Nogat. Olsem na mi tu i laik singaut long yu, long wanem mi trastim yu na mi save olsem yu bai i harim ol singaut bilong mi. Yu gutpela tumas, olsem na yu no inap long sakim tok bilong ol manmeri i askim yu long helpim ol.

Santu Josep, yu papa bilong Jisas, em i Bikpela bilong yumi. Mi askim yu long harim ol prea bilong mi na marimari long mi oltaim.
Amen.

Long Nupela Testamen i gat liklik toktok long laip bilong santu Josep, na yumi no inap long painim planti stori long laip bilong em.

Bipo bipo tru i kam inap nau Mama Sios na ol santu i bin soim bikpela rispek na laik long santu Josep, na oltaim ol i bin lotu long em. Maski yumi no save planti samting long laip bilong em, dispela nem «**Man bilong Maria**» (Mt 1:16) i gat bikpela mining tru na i givim bikpela namba na ona long santu Josep. Long wanem dispela nem i min olsem God yet i bin makim santu Josep bilong lukautim Jisas na mama bilong em yet.



Yia blg Santu Josep



.....
**SANTU
JOSEP**
.....

▶ **NAMBA I PREA BILONG
SANTU JOSEP**

O gutpela santu Josep! Yu papa bilong Jisas, yu man bilong Maria, yu go pas long Holi Famili, yu was santu bilong Katolik Sios, yu was santu bilong ol famili bilong dispela graun. Tude mi makim yu olsem spesel was santu bilong mi. Mi laik ran i kam long yu long taim bilong hevi na wari. Givim gutpela tingting na strong long mi, bai mi ken bihainim ol gutpela pasin bilong yu. Helpim mi long prea gut, long wanem oltaim yu bin toktok wantaim Jisas, em i God tru na Bikpela bilong Mipela. Mi laik pas wantaim Jisas, Maria na yu oltaim. Helpim mi long bihainim gut ol mandato bilong God. Na long taim indai i laik kisim mi, helpim mi long i dai wantaim grasia bilong God long sol bilong mi. Long taim mi i stap laip yet na long taim bilong indai mi laik givim glori long God tasol. Amen.



**PREA PAPA SANTU POP LIO
NAMBA I 3 I BIN MEKIM**

▶ O gutpela wasman bilong mi, santu Josep! Tude mi kam long yu bilong askim yu long helpim mi. Mi beten pinis long meri bilong yu, santu Maria, tasol nau mi laik beten long yu. Tingim laik bilong yu i go long santu Maria na helpim mi long ol samting i save mekim bel bilong mi i hevi. Tingim laik bilong yu i go long Pikinini Jisas na helpim mi long go long heven. Jisas i bin kapsaitim blut bilong em bilong kisim bek mipela, olsem na mi askim yu long tingim dispela sakrifais bilong Jisas, bai yu tu i ken marimari long mi na harim olgeta singaut bilong mi.

O gutpela wasman bilong Holi Famili! Sambai long mipela tu, ol manmeri i stap lain bilong Jisas. Helpim mipela long abrusim ol pasin nogut na long winim olgeta

tingting i laik paulim bilip bilong mipela. Yu i stap antap tru long heven, olsem na yu gat strong bilong helpim mipela oltaim.

Satan na ol spirit nogut i laik bagarapim mipela na pulim mipela long mekim sin na i go long hel, tasol strong bilong yu inap long daunim ol traim nogut bilong em. Na mipela i askim yu tu long was long Katolik Sios bilong God, long wanem planti manmeri nogut i wok hat long daunim em na rabisim em.

O gutpela santu Josep! Sambai long mipela oltaim! Strongim mipela long bihainim ol gutpela eksampel bilong yu, bai mipela tu i ken i go long heven wantaim yu, Jisas na santu Maria. Helpim mipela long i dai wankain olsem yu bin i dai, klostu long Jisas na santu Maria. Amen.

